

Ho Maria ita agradese

Mensajen ba Povu Venilale – 2 Outubru 2013

Ksolok boot ida mai ha'u ohin iha ne'e atu selebra tinan 25 prezensa FMA nian iha Timor-Leste.

Ha'u lori Madre nia kumprimentus, madre Yvonne Reungoat, no Konselleira jerál hotu nian liuliu sira ne'ebé mai ona iha ne'e hanoin imi ho simpatia no orasaun.

Ha'u haksolok ba organizasaun di'ak festa nian no liuliu ba di'ak boot ne'ebé ha'u-nia irmán maluk sira no ema laran-luak barak realiza ho aten-barani no fiar.

Husi ita-nia prezensa dahuluk iha Venilale iha 1988 lurón hira mak ita liu ona! Buat hotu ne'ebé Maromak haraik mai ita atu hala'o, hala'o ho Família Saleziana iha fidelidade ba Don Bosco no Maria Domenica Mazzarello nia espíritu, ho sintonia ho Kreda no nesesidade sira família no juventude nian.

Salezianu sira, FMA, foin-sa'e sira, labarik sira, antiga/u aluna/u sira, kooperadora/kooperadór sira, voluntária no voluntáriu sira: buat hotu nu'udar sasin ida relasaun no don nian ne'ebé tulun atu karizma sai vizivel no moris iha Kreda ne'ebé iha Timor-Leste.

Ita ohin iha ne'e atu konjuga hamutuk verbu ruma hanesan Papa Francisco hanorin mai ita.

** Halo memória no agradese*

Ita iha-ne'e atu selebra no hasa'e hahi'in ba Aman ba rikusoin moris nian ne'ebé naksira husi comunidade ki'ik dahuluk iha Venilale no husi barak seluk iha tinan 25 nia laran. Maromak mak don hotu nia hun. Maria Ausiliadora mak inspiradora, matadalan ba ita-nia comunidade ida-idak. Ho nia no tanba nia fini ki'ik dezenvelope no sai ai-hun boot ida.

Karizma salezianu mak don furak ida Espíritu Santu nian ne'ebé integra iha kultura oioin, sai riku husi sira-nia kontributu no habelar nafatin vitalidade foun.

Para ohin atu halo memória no agradese mak devér uluk liu ba ema ne'ebé selebra festa ida hanesan ne'e.

Maria Domenica Mazzarello hakerek ba misionária ida: "Ida-ne'e mak Maromak nia liman serbisu iha ita!" (Surat 66,2). Ita iha-ne'e atu selebra liman-fatin misterioza, maibé réal Ninia liman nian ne'ebé, ho ita-nia liman sira, kontinua hala'o knar iha mundu ba foin-sa'e sira, labarik sira, feto sira nia edukasaun.

Ema dehan mós katak povu ida lahó memória mak povu ida lahó futuro. Biar nia istória umilde no simples, nia nafatin sai maklorik valór sira-nian, esperiênsia sira-nian, tradisaun sira-nian, fekundidade nian. Deskobre rikeza ida-ne'e haburas sentidu hola-parte nian ba família ida, ba povu ida. Tanba ne'e ita agradese ema hotu ne'ebé halo posivel istória ida-ne'e: oinsá ita la hanoin padre

Carbonel, padre Locatelli, irmán Paola Battagliola no irmán barak no maun-alin barak seluk ne'ebé kolabora atu fó fundamentu ba, Inspetoria nurak, maibé forte ne'ebé foti naran husi Maria Mazzarello?

Loos duni, hanoin fali istória ida katak rekoñese elementu sira limite nian, oras nakukun no terus nian ne'ebé kahur malu iha istória moris loroloron nian. Buat ne'e hotu – iha Maromak nia lójika – bele hetan valorizasaun nu'udar esperiénsia kreximentu nian no konkista foun no aten-barani nian.

** Kontinua la'o ho laran-metin/konfiansa*

Hanoin fali la'ós de'it hateke ba kotuk, ba pasadu, maibé hateke ba loron-ohin. Ita simu “murak-mean” folin boot husi sira ne'ebé mai uluk ita no simu bolun la'ós de'it atu rai di'ak nia, maibé atu dezenvolve ho kreatividade. Presiza atu loron ba loron iha atensaun ne'ebé neon-na'in ba Maromak nia bolun foun, ba sinál sira tempu nian no ba pobreza foun sira.

Iha ita-nia tempu ohin mak karizma tenke inkultura no sai nabilan. Ita iha responsabilidade atu fó oin ida moris nian, furak no nabilan ba karizma. Ita simu liman-rohan no ita rasik prepara daudaun liman-rohan ida ba sira ne'ebé mai depoizde ita. Ida-ne'e la'ós pasajen ida ideia nian, maibé komunikaun ida moris nian, sasin nian, fidelidade nian. Ita hatene katak moris mai husi moris no ho marka krús nian.

Konserteza ita la bele halo fali esperiénsia uluk nian, maibé ita bele hetan inspirasaun husi domin no aten-barani misionáriu ne'ebé sai kbiit ba ema no comunidade sira ne'ebé ohin ita halo memória.

Buat ne'ebé harii iha domin hela ba nafatin nune'e ta la'o hamutuk iha tempu ohin ho esperansa no larna-metin.

Iha S. Eskritura hateten mai ita katak Na'i akompañia ninia povu iha rai-fuik maran iha loron ho koluna ida kalohan nian no iha kalan ho koluna ida ahi nian (kf Sab 18,6). Ida-ne'e mak sinál ida katak Maromak nunka abandona ninia povu. Memória ninia povu nian eduka ita atu iha konfiansa iha Na'i ne'ebé akompañia ninia oan mane no feto sira husi moris-atan ba liberdade, husi dezánimu ba esperansa.

Maibé ninia asaun iha mundu la'ós buat ruma májiku nian. Maromak, ne'ebé kria ita riku ho don sira, husu ita-nia kolaborasaun.

Iha dalan ordinária Nia, ne'ebé tau matan ho matenek rohan-laek ba Ninia kriatura hotu, hakarak tau matan mai ita liuhusi mediasaun umana sira. Inan-aman ida-idak, edukadór/a ida-idak, ema ida-idak mak sinál ida Ninia domin nian. Nia presiza ita-nia umanidade atu revela An. Nia, ne'ebé buat ida la kuran atu eziste, presiza ita!

Ita-nia an no ita nia hahalok tenke hatudu Ninia oin laran-di'ak nian, dame nian, laran-sadia nian atu harii mundu ida riku liután iha laran-di'ak, iha dame, iha laran-sadia, ih ajusitsa no iha liberdade.

** Harii futuru*

Hanoïn fali, halo memória, la’o iha domin mak abut futuru nian. Hateke ba pasadu la’ós de’it atu halo ita sai nóstálgiku kona-ba esperiênsia ida ne’ebé la fila ona, maibé katak projeta an ba oin ba moris ida ne’ebé loron ba loron ita prepara ho ita-nia hilin sira no ita-nia projetu sira.

Ita saleziana sira, iha Fundadór sira nia ain-fatin, soi misaun ida ne’ebé harii futuru: edukasaun. Ema ne’ebé dedika an ba edukasaun harii povu foun ida, família foun sira, sidadaun sira ne’ebé responsavel no onestu ne’ebé sei fô kontributu válidu ba sosiedade no Kreda.

Ita moris momentu istóriku ida importante iha-ne’ebé fundamentál liu responsabilidade ne’ebé ita ida-idak asume hasoru don úniku no repete-laek Espíritu nian ba Kreda, ba humanidade, ba ita-nia Institutu. Kuran iha responsabilisade ida-ne’e signifika kuran iha buat ne’ebé ita-nia karizma signifika ba Maromak nia Kreda no ba sosiedade ohin nian.

Iha versaun pesoál ida ne’ebé ida-idak fô ba karizma ne’ebé nia simu bolun no hola parte. Bainhira ema ida sai responsavel liután ba karizma, karizma sei hatudu sai liuhusi ninia temperamentu rasik, liuhusi ninia mentalidade rasik, domin rasik, sirkunstánsia sira nia moris bá no no liuliu, liuhusi liberdade rasik. Ema ida-idak bele deside atu moris ho fidelidade eh lae, moris ho radikalidade don nian eh lae, halo ba karizma no ba istória buat ne’ebé ó hakarak: diminui nia, halo nia sai parsiál, haliis tuir gostu rasik eh interesse rasik, abandona nia tan negligênsia, tan superfisialidade, ka moris karizma ho laran-luak no iha plenitude.

Ita mak Maria Tulun-Na’in nia oan-feto sira (FMA): sai oan-feto sira katak halo sai vizivel iha ita-nia moris perfil/karakteristika sira Inan nian. Hanesan nia ita hakrak medita Liafuan ne’ebé inkarna iha ema sira no ia akontesimentu sira: rai iha fuan laran moris no halo nia buras; moris «rahun-di’ak fiar-na’in sira-nian no dedika ita-nia an ba asaun apostóluka maklorik esperansa nian (C 44) iha sosiedade ida nakdoko ho tensaun barak no iha rai sira ne’ebé dame hetan nafatin ameasa.

Ho Nia ita hakarak sai espasu sasimuk no enkontru nian atu oferese uma ida ba sira ne’ebé la iha uma, atu sai fatin solidariedade, ospitalidade, raronak, komprensaun nian ba ki’ik no kiak hotu ne’ebé Na’i entrega mai ita.

Iha África iha provérbiu signifikativu ida: “Ema ne’ebé eduka feto ida eduka povu ida”, tanba sira iha konxiênsia maka’as kona-ba feto nia insidênsia ba nasaun sira nia progresu. Ha’u hanoïn katak buat ne’e vale ba rai hotu no ba Timór.

Atu harii futuru ita tenke tau atensaun iha edukasaun hahú husi ki’ik sira, kiak sira, feto sira, husi periferia hanesan Papa Francisco hateten. Hotu-hotu iha nesesidade ba edukasaun integrál atu bele moris nu’udar ema livre, onestu, tasak, atu hatene hatene sai krítiku hasoru kondisionamentu sosiál negativu no destrutivu moris nian, família nian, progresu loos povu sira-nian.

Edukasaun ida ho abut iha valór sarani sira, sira ne’ebé Jezús haklaken iha Ninia Evanjellu, ida-ne’e mak fundamentu seguru uma ida ne’ebé ita hakarak harii ba sira ne’ebé sei mai depoizde ita.

Ita hein katak ita-nia comunidade sira, iha sinerjia ho Família Saleziana tomak, foin-sa’e sira, leigu/a sira ne’ebé fahe karizma ho ita, família sira, autoridade sivíl no relijioza sira territóriu nian, sai fatin autêntiku iha-ne’ebé harii futuru, um ane’ebé evangeliza, katak ambiente sira iha-ne’ebé esperansa sei buras, transparênsia loos Jezús Moris-Hi’as nian, ne’ebé moris iha ita leet.

Ne’e mak ha’u nia augúriu husi fuan ba imi hotu.